


HULANDA A APROBA PROYECTO DI PRISON

**HOPI MOVECION
NA AEROPUERTO
DURANTE WEEKEND
DI CARNAVAL**



DIARIO

DI ARUBA

Bo Matutino
Netamente Arubiano

DIAHUEBS 21 DI FEBRUARI 1985 AÑA 4, No. 1260

SAFARI CLUB DI BELGICA INTERESA DEN PALM BEACH HOTEL

ORANJESTAD(AAN)—Segun informacionnan tin deliberacionnan tumando lugar cu e organizacion di viaje belgo, Safari Club, cu actualmente ta specializa den viajenan pa Seychellen.

Safari Club tin intencion di trece tur siman 250 turista pa Aruba y Curacao, kendenan ta keda ariba e islanan aki dos siman largo.

E organizacion di Belgica aki kier cumpra tambe hotelnan pa asina

garantiza su clientenan cambernan, durante e viajenan, y segun e informacion cu DIARIO a ricibi, nan tin wowo ariba Aruba Palm Beach Hotel na Aruba y Las Palmas Hotel di Curacao.

E informacion aki te ainda ta basa ariba deliberacionnan cu ta tumando lugar pero cu no a ser concretiza ainda.

SUELDO HALTO Y LEY DI RETIRO TA STROBA INVERSIONISTANAN

ORANJESTAD(AAN)—

Un di e prome tareanan cu mester trata na realiza mas pronto posibel ta atraccion di empresanan pa establece na Antillas Hulandes. Segun ministro plenipotenciario na Hulanda Mr. G.T. Hernandez, Actualmente deliberacionnan ta tumando lugar cu varios compania di computer afilia na American Computer Association. DIARIO a informa di esaki

den primicia algun siman pasa.

E ministro ta bisa cu e empresanan aki ta situa na Silicon Valley, (E centro industrial americano di computer y informatica) y nan intencion ta pa asamblea computernan of aparatonan pa computer na Antillas pero e problema te awor ta e sueldonan halto cu ta ser paga na Antillas y e ley di retiro. Segun e empresanan esakinan mester bira mas flexibel.

BISHITA DI PROME MINISTRO NA HULANDA NO TA SIGUR AINDA

ORANJESTAD(AAN)—Segun informacionnan e bishita cu prome ministro Maria Liberia Peters tin intencion pa haci pa Hulanda no ta sigur ainda. Durante un conferencia di prensa dia 11 di januari na final di e bishita di De Koning na Antillas, Mr. Hendrik Croes a anuncia e bishita di prome ministro na hulanda, pero te ainda e bishita aki no a wordo

ni discuti den Consejo di Ministro.

Segun Ministro Plenipotenciario Mr. G.T. Hernandez, kizas esey ta bata deseo di Ministro Croes, pero cu e ministro Arubano no por determina esaki ariba su mes.